

四庫全書

集部

欽定四庫全書

勉齋集卷十九

宋 黃榦 撰

記一

楊恭老敬義堂記

人稟陰陽五行之秀氣以生而太極之理已具其根於心也未發則為仁義禮智之性已發則為惻隱羞惡辭讓是非之情其施於身也則為貌之恭言之從視之明聽之聰思之睿其見於事也則為君臣之義父子之恩

夫婦之別長幼之序朋友之信與凡百行之當然者是
其稟賦之初內外之分固莫非天理之所具然少有不
謹則人欲得以間之合乎天理則順直端方而無邪曲
偏設之累人欲間之則反是矣是故存養省察於幾微
之間其惟敬義乎主一之謂敬合宜之謂義主於一則
思慮不雜天理常存而內直矣合於義則品節不差天
理常行而外方矣內直外方則所謂具衆理宰萬事有
以全吾心本然之妙矣坤順也二中也以六居之正也

順理而中正直方之義也聖人推原其所以然者而為之言曰君子敬以直內義以方外示人之意切矣學者其可不務乎長溪楊君通老致其兄恭老之意曰吾嘗以敬義名吾堂日與吾兄弟諸子講習乎其中子與吾弟交最厚其為我言其意輒謝不敏而通老之請益堅吾與通老從遊於夫子之門二十年矣通老長於吾十年而首與之交相好也通老溫厚質實信道甚篤余未及識恭老而通老以為不可及其亦賢者歟以昆弟之

賢而朋友之契以切磋之義責於予予亦安得無言耶
予惟楊君亦既深知古人為學之要矣兄弟諸子藏修
遊息於斯堂之上端居靜慮斂襟肅容深惟其義而藏
諸中察諸念慮之隱微驗諸事物之雜揉使此意常存
無少間斷則大易之旨固已不占而有孚矣余老矣無
所歸亦將裹糧而前歷堦而升以聽楊君兄弟之教也
於是乎言長樂黃餘記

鄭次山怡閣記

怡閣者象山鄭君次山之家塾也以怡名取夫子答子
路問士之意也紹熙二年冬閣成以書藏之帥其子若
弟之子群居而肄業焉明年夏命其子適成叔來告曰
願有記翰於鄭君未嘗有一日之雅而已竊聞其有長
者之風矣及觀成叔之為人襟度夷曠智識闡爽則又
知君之施于家者信可書也遂不辭而言曰自竄竊慕
擬之學可苟富貴而孔氏詩書遂為無用之具其間博
聞強記者亦不過騁譁辯誇文章而於古人之學修身

及家者漫不復講今君教其諸子而首欲其篤於兄弟之愛可謂審所輕重而不惑於流俗者矣蓋五典者天叙之常理人道之大端也折而言之則君臣夫婦朋友者人之屬而天屬之親惟父母兄弟為然其四肢百體皆一氣之所生其入孝出悌為萬善之根本則兄弟之義可不為重乎古之稱其從父者曰世父叔父從父稱之則曰兄弟之子後之稱其從父曰伯叔而父之義始不明矣謂吾姑者吾謂之姪而世率以姪稱其兄弟之

子則是不以子待之也父之兄弟與夫兄弟之子猶有父子之稱者以其同出於一氣也則從父兄弟宜不猶吾之兄弟乎所貴乎士者以能深明其同氣之義而不失其天性之至愛耳若夫利欲膠固橫目自營一室之內乖離鬪狠則雖通今博古高談天人而亦何足為士哉此亦君子所以為教而獨有味乎夫子之言也君之諸子居是閤也仰而觀焉俛而思焉知君之待兄弟之子如己子焉則吾之處乎兄弟者其則不遠矣利欲之

私豈足易我天性之樂哉而又擴而充之至於天與民
與各盡其道則於君子所以為教者可無負也此邦之
人聞君之教其諸子者若此則過君之居履君之閭孰
不自歎夫流俗之薄而陰革其乖爭之習乎榦嘗東浮
大江躡雲門跨石龍以望所謂象山者其巖谷峭崿風
濤洶湧甚可愛也異日尚當從君怡閣之上觀君之施
於其家以及鄉人者焉君亦坐予而熏沐之哉乃為之
記不惟以見君之志亦以自警云五月壬辰朔北山黃

榦記

劉正之遂初堂記

始予識劉君正之于屏山正之年方十六七予意其貴顯已三世綺襦之習聲色之樂軒冕之味必有以動其心成其質者已而觀其貌聽其言察其行則褒衣博帶墊巾芒屨不見其瑤環瑜珥也左圖右史吟風詠月不見其粉白黛綠也高談抗論動與世忤不見其脂膏嫵媚與波上下也予退而歎曰富貴人所欲也彼豈異于

人哉所謂居移氣養移體者果足信耶抑其年少氣銳久而遂變也哉自是以來與之交日熱情日親即其新以考其舊蓋有甚焉無不及也其後予以禍患挫折退歸故鄉而正之方馳騁東西為諸侯客蓋不見者十有餘年旣而聞其以憤世嫉邪斥辱權要罷歸田里其先公之賓客有顯國秉者其先太夫人之親族有屬中宮者宦遊之交好有為天子之耳目者宜若可以白白且彈冠矣親故愛正之者亦率以是勉之而正之偃然而

不應日與親朋彈碁賦詩蒔花植竹蕭然若將終身焉
予又退而嘆曰是其天資之美不以外物累其中者也
是真能不負其初心者也此古之有道者之所難而風
雨之詩所為作者也癸亥之秋予復訪正之于屏山正
之與予言曰予少時嘗以遂初名其所居之堂晦菴朱
先生嘗為予書之子能為我記之乎予曰若先生固望
以遂其初予固有以知子之果能遂其初也富貴之毒
人也甚於鴆惟其嗜之美也而其毒愈深唧蛆甘帶鴆

鴉嗜鼠彼豈知為臭腐哉蟠間之餘嗟來之食蓋有妻妾之所泣乞人之所不屑者而士大夫不顧廉耻而冒求之今子生于公相之家狃于富貴之樂而能遺外聲利不改其度如此是豈不甚可敬哉雖然子之初亦既遂矣吾請卒言其所謂初者子其為我聽之天地之初太極是也人物之初性善是也聖賢之初赤子之心是也人其能遂吾之所謂初者乎子能遂之則子之家之初忠烈如延康勲業如少傅道德如屏山備前人之美

發揮而光大之如忠肅者子皆有以遂之矣正之曰某
不敏敢不敬蚤夜以承子之教因書其本以為遂初堂
記七月朔旦長樂黃餘記

家恭伯重齋記

眉山家恭伯名其讀書之齋曰重取夫子不重則學不
固之義屬餘記餘竊聞大學之道以格物致知誠意正
心修身為本而推之以齊家治國平天下格物致知又
以居敬為本焉先儒論居敬之方則曰主一之謂敬又

曰整齊嚴肅則心便一整齊嚴肅夫子所謂重而又居敬之本也容貌之莊言詞之謹非致飾於外制於外所以養其中也輕淺浮躁其中可知矣何以究此理之精微存此心之純一哉世之學者溺心於文詞功利之末固非大學之所當務志於學而不得其要則又捨近驚遠憚拘檢而樂放肆其於學亦豈能有得耶恭伯負奇才據謹論擢高科守其家學之傳汲汲然以讀書講習為事而又必以重為先可謂得為學之要矣然則以弘

殺而任斯道之重以斯道而任天下之重亦由是而益
用力於大學之道而已恭伯勉之哉恭伯名抑今為嘉
定府學教授嘉定辛未長至三山黃餘記

郭聖子瑞蓮堂記

有蓮偶而華邑人瑞之不以私獻於令令顧德弗稱復
歸之輦於通衢邑人縱觀焉桂湖主人郭君來請曰某
之先嘗面池而堂將以瑞蓮名願有記蓮花之君子也
蓮而瑞君子道長之祥也學而德進仕而業廣皆道之

長也天其啟之矣吾邑之士勉乎哉嘉定癸酉六月既望長樂黃餘記

林正卿龍門菴記

度地居民為城邑為鄉井其居之安其生齒阜以蕃則其山川融結磅礴深厚宛委回復必有可觀者若夫萃為中和散為英華涵濡孕育為哲人才士則其瓌偉絕特必有大可觀者焉蓋人稟陰陽以生川流山峙陰陽之大者具剛柔厚薄盈虛聚散宜悉相似也吾友林正

卿所居之鄉山曰鼎峯水曰梅溪鼎峯之山析為二支東西迭起仰而相向俯而相就卒而交互以相入梅溪之水沿山而流若往而復若低而觸若停而蓄莫知其所自出如是者十餘里然後聳為雙崖瀉為三灘崖東灘駛律率澎湃露怪呈奇不可名狀蓋一鄉之屏蔽神龍之所潛也其鄉士友顧而樂之於崖之東結茅為菴名以龍門以為禱祈遊覽之地而屬其友黃縣記之縣未嘗至其鄉獨嘗與其士友遊大抵潔廉峭峻好義而

喜文則山川之氣實使然也人固囿於氣當有以充其
氣山之高水之深神龍之變化苟有以充之吾分內物
耳不然樵漁耕販往來其間者相踵也於我何有焉今
正卿能與其鄉人徜徉盤礴而講其所聞於師友者以
充其所稟之氣庶乎博碩宏偉而無負於茲土之勝矣
嘉定三年七月朔日長樂黃榦記

安慶府新建廟學記

聖人之道與天地並學校之設以明道也夫陰陽五行

發生萬物而太極之妙周流不窮凡囿於造化之內者
鈞稟是氣則鈞具是理人為萬物之靈則受中以生統
粹至善而日用常行各有當然之則貫徹古今充塞宇
宙無適而非此道之寓也聖人參天地以立極既為之
發明其蘊而經理斯世者又設為學校以教之上自王
國都而下至里術蓋將與一世之人凡有血氣心知者
莫不周旋涵泳於吾道之中顧安有遠近內外之間哉
龍舒為郡自周之初以國著名其沐文武成康之遺澤

舊矣其地城距天下之中王者故都千餘里風氣所鍾
正朔所及古男服之國其山川之勝扶輿磅礴泓澄演
迤為兩淮絕特之觀其習俗質樸而渾厚其奇才秀民
挾策讀書者彬彬也而郡之學獨簡陋弗稱累數十百
年莫有過而問者焉蓋自衣冠文物萃於東南仕於淮
者咸以為遠且外化民成俗所當急者反緩之吾道之
大寧若是耶攷之圖志自唐有夫子廟學之始建獨闕
弗載舊學在今學之北政和間改創今地紹興初既廢

復興其後或增或葺大抵因襲簡陋非有意於崇學校
美教化也嘉定壬申右史舍人直龍圖閣張公來守是
邦進謁先聖退而歎曰若是其隘也閱武之地迫於學
宮非所以右文教也徙置他所而學之地始闢則又歎
曰若是其陋也肄業之齋環於廟殿非所以尊先聖也
更創諸齋於所闢之地而廟之制始嚴右廟左學位序
既定凡屬於廟者首建郡守齋廬以肅祀事既又考諸
鄒兗二公以及從祀坐向等級率謬不應古法以待講

朱文公先生所定新儀悉釐正之郡之先賢與周程三先生舊祠學門外至是遷之以亞從祀凡屬乎學者則北為傑閣以藏宸翰閣之下為師生燕見之堂堂之北為教官齋宿之舍列六齋以及學職之位於東西兩廡其南有軒軒南有池池上有亭為游息之地其外為射圃深廣崇嚴眈眈翼翼規模之壯東南諸郡莫能過也材取於在官之竹木工取於在學之佃夫邑之寓公間遣助焉興是大役民不知也既以學前官池與官田若

千畝廣瞻學之廩又以白沙魚池歲收累千緡以待士
之貢禮部與喪塋之不能舉者贐而周之廟學之支傾
補漏亦於是取辦焉嗟夫公之加惠於此邦之士厚矣
此邦之士鼓篋而來攝衣而升入乎廟瞻聖賢之儀容
以繹其典訓處乎學聆師友之講習以考其德行道義
之著見躍如也又能存養於齋莊靜一之中省察於念
慮起居之際窮理以致其知力行以踐其實則道在我
矣積習既久風俗日變雖鄒魯可也孰謂衣冠文物獨

東南之為盛哉公名嗣古直寧人蚤以實學登顯貴刻意於道以已所得欲人皆然其守舒尤以教化為先務未朞年政成令孚百廢具舉廟學之建視他郡為最鉅既訖功以府學教授趙汝遂之請屬榦記之竊惟舒之先賢有文翁者興學於蜀人化之漢史既傳其事千餘年間蜀之名公項背相望猶相與言曰此文之教也公能視舒如蜀舒之人豈不能以蜀自視視公如文哉豈可使之泯泯不少槩見而太史氏失其傳哉遂不敢辭

而紀其本末侈公之惠以厲舒人使來者有考也學成於癸酉十月之庚子董其役者懷寧尉范楷兵馬都監鄭遜云後十日具位黃榦記

平江府和靖尹先生祠堂記

和靖尹先生寓居平江府虎丘西菴勝曰三畏齋所題雜錄論語解皆可考所寓即上方也去之七十有五年郡守直秘閣陳君芾通守太學博士丁君煇始度菴空地為屋繪先生象祠焉尊前賢厲後學也先生諱焞洛

陽人年二十師伊川程子舉闈策士議誅元祐黨不答
遂棄舉子業靖康初以布衣召不至詔褒為和靖處士
洛陽陷家殲焉先生死復甦竄長安山谷中逆豫以禮
聘溺水逃去展轉蜀道累年紹興五年以宗政殿說書
召凡二十辭八年冬始入見除秘書郎明年遷少監太
常少卿權禮部侍郎每遷輒力辭其冬除徽猷閣侍制
提舉萬壽宮辭不已遂奉外祠即虎丘以居年已七十
矣貧無以為歸也後二年竟歿於會稽之寓舍先生所

遇於世如此蓋嘗考先生之所學篤於踐行不為虛語
未嘗求人之知人亦莫能窺其所蘊也今其可見者經
惟進講門人記錄耳惟即其所過於世者觀其所取舍
然後知先生之於道卓乎不可及矣利害者人心之私
理義者道心之公公私之間迭為勝負一取一舍而賢
不肖可知也至於歷險難之極而不變處貴顯之驟而
不動抱仁履義終其身而不悔非盛德能若是乎理義
充於中則禍福成敗榮辱得喪膠轕萬變日陳乎前而

此心自若也程子之門從遊之士皆閎博俊偉極天下之選而於先生亟稱之其察之審矣顏淵退然如愚而夫子稱之亦曰簞瓢陋巷不改其樂又曰庶乎屢空然則先生者程門之顏氏歟里巷小人顛冥於利慾之塗不足道學士大夫則知禮義矣臨利害未毛髮許棄其所守者可歎也聞先生之風得無少愧歟有志於道者亦可自勉歟二君為是祠有補於名教大矣故述其躬行之大節以示學者庶幾驗之於身而得於先生之道

云嘉定七年六月既望後學黃縣記

袁州萍鄉縣西社倉黎矩堂記

晦菴先生初創社倉以惠其鄉人欲以聞於朝頒之州縣江湔間好義者爭徵焉袁州萍鄉社倉九縣西其一也鍾君唐傑為之記有堂焉未名胡君叔器謀於縣以黎矩名之叔器歸以語唐傑唐傑曰可乎哉以書來曰子為我記之縣聞之師曰黎度也矩所以為方也處已接物度之而無有餘不足方之謂也富者連阡陌而餘

梁肉貧者無置錫而厭糟糠非方也社倉之創輟此之
有餘濟彼之不足絜矩之方也君子之道必度而使方
者乾父坤母而人物處乎其中均稟天地之氣以為體
均受天地之理以為生民特吾兄弟物特吾黨與則其
林然而生者未嘗不方也惻隱之心人皆有之赤子入
井一牛轂鯨於已何與而悚惕生焉一原之所同出自
不能已耳則方者又人心之同然也飢而食寒而衣仰
事而俯育人之同情也是以古之帝王設為井田家受

百畝上有補助之政下有調救之義於吾心有病焉此
方之政也已欲立而立人已欲達而達人老吾老以及
人之老幼吾幼以及人之幼因其分殊原其理一方之
所以為教也夫稽之天理驗之人心參之帝王之制質
之聖賢之訓君子之道孰有大於絜矩者乎若夫橫目
自營拔一毛不以利天下充其小己自私之心雖一家
之內父子兄弟尚有彼此之分而況推之人物乎故不
能以絜矩為心者拂天理逆人心帝王之所必誅聖賢

之所必棄也然則知社倉之為義而置者絜矩者也不知社倉之為義而不置者不絜矩者也既不知之又欲壞之是自不能絜矩而又惡人之絜矩賢不肖之分曉然矣又嘗即鍾君之記而考之萍鄉之為邑久矣為令為尉於其邑者不知幾人而孫公潘公獨能留意為士而生且長於其邑者又不知其幾人也彭君雖不知其人而鍾君胡君則貧不能自立者也而亦拳拳於此是四五人者其賢於人可知矣因是推之則向之捐米以

置倉如柳如宜者其人又可知矣又嘗考之鍾君嘗求
記於先生而先生為之跋考其歲月蓋屬續之前二十
日也其詞抑揚感慨有遺義焉其天地生物之心至於
老且歿而不衰也某年某月某日具位黃縣記

吉州永新縣學記

永新於吉為壯邑山水明秀土地衍沃其俗富足而家
業儒其學校之創舊矣嘉定元年盜發荆潭結黨與負
險阻其抗逆王師環數州之地千餘里被其毒永新當

往來之衝剽劫焚蕩官廬民舍寸椽尺瓦無在者越數
年始克撫定縣尉范君某芟荆棘夷瓦礫約已嗇用首
建縣學而一新之以其州事判官孫君德興之書來請
記繇謝不敏范君秩滿復過予請益堅方盜之始平也
山谷之反側未盡安田野之流庸未盡復弭盜安民尉
職也弦歌揖遜經生學士平居暇日以講以肄尉亦何
急於此歟蓋嘗原盜之所由興矣慶元開禧間抵排道
學之說指士之潔廉好禮誦先王之言行其道者一切

以偽目之貪得嗜利之流習為苟賤無耻以自別於道
學阿權姦竊威福志氣盈溢遂啟兵端僨軍殺將兩淮
荆襄為之騷然東南之民困於供億監司州縣方且括
民財奉苞苴民不勝其困江西之俗豪家富室喜於兼
并為之守令者不惟無以抑之而反縱之而細民又困
矣夫民生不見禮義之及已而困於衣食之不足幸菑
樂禍以圖逞其不平之憤則去為盜賊而焚燒縣邑賊
害良民者勢使然也知盜之所由興起於不悅學則弭

盜安民之術舍學何以哉此則范君之所為汲汲也夫子之言曰君子學道則愛人小人學道則易使也使夫子之教行則進賢退不肖者必不肖用民之賊為監司守令者必不肖為民之賊富民必不肖兼并細民亦不肖相率而為不義如是則不惟盜賊之可弭雖使人有士君子之行可也然則范君之所尚俗人以為迂而君子以為急不惟永新之為官民者所當知而天下之所當取法也故為之推廣其意而記其學成之歲嘉定某

年某月某日具位黃榦記

徽州朱文公祠堂記


道原於天具於人心著於事物載於方策明而行之存
乎其人聖賢迭興體道經世三綱既正九疇既叙則安
且治聖賢不作道術分裂邪說誣民充塞仁義則危且
亂世之有聖賢其所關係者甚大生而榮死而哀秉彝
好德之良心所不能自已也堯舜禹湯文武周公生而
道始行孔子孟子生而道始明孔孟之道周程張子繼

之周程張子之道文公朱先生又繼之此道統之傳歷萬世而可考也文公徽人也其歿也徽之士相與言曰公之系茲土吾郡之盛事也即郡之學繪而祠焉太守趙君師端至視其祠褊且狹不足以稱邦人思慕之意改創於講堂之北且屬餘記之竊惟自昔聖賢之生率五百餘年而一遇孟子既歿千有五百餘年無聞焉考其世系則又皆中土之所生而南方則又無聞焉歷世之久輿地之廣其間豈無閎博俊偉之士而不足以與

聞斯道之傳至我本朝周程張子既相望於一時而文
公復興於未及百年之後周子既生於舂陵而文公復
生於新安豈非治教休明文武周浹天運之所開地靈
之所萃曠古之創見而一代之極盛者歟秦漢以來斯
道晦蝕天理不明人心不正事物當然之則昧沒而不
彰方策不刊之訓殘闕而將墜周程張子既推明其大
端而傳訛襲舛浸失本真迨我文公稟高明之資厲強
毅之志潛心密察篤信力行精粗不遺毫釐必辨至其

德盛仁熟理明義精歷代相傳之道粲然昭著故雖窮鄉晚出亦皆知有聖賢教人之旨然則公之生於世有功於斯道大矣至公之歿海內之士莫不嗟咨涕洟失所依歸而況生長於公之故里者乎宜其思慕不能自已趙君大其祠宇以慰其心也亦宜矣哉雖然思其人不如尊其道慕其迹不若師其心今公之書旣家藏而人誦之矣惟不為習俗之所遷不為利害之所誘居敬以立其本窮理以致其知躬行以踐其實則雖越宇宙

如親見之道之明且行世之安且治可冀也此當世之
所宜共勉徽之士其可無以勉之哉師端與其兄弟皆
從遊於文公先生之門故其為政知所先務如此堂成
於嘉定七禩八月董其役者欽命孫某十月朔門人黃
縣記



勉齋集卷十九

欽定四庫全書

集部

勉齋集卷

二十一

詳校官庶吉士臣吳烜

主事臣呂雲棟覆勘

總校官庶吉士臣倉聖脉

校對官中書臣王家寶

謄錄監生臣姚元開

欽定四庫全書

勉齋集卷二十

宋 黃榦 撰

記二

漢陽軍學五先生祠堂記

嘉定八年冬十有一月漢陽軍學五先生祠堂成郡假
守長樂黃榦帥其屬與在學之士諏日而舍奠焉郡丈
學金華潘行與其諸生合詞而請記竊惟成均之法合
國子弟擇有道德者使教焉歿則祭於瞽宗謂之先聖

先師國無人則取諸其鄰與其鄉鄰而嘗遊宦於其國
有善可紀者亦祀之若孔子孟子及其門人則又不必
其鄉鄰遊宦而祀典所秩通於天下此學校之所同未
有能易焉者也漢陽為郡訪之於學常祀之外乃咸無
焉其江山之勝習俗之嫩禹功文化載於詩書士生其
間卓然自立者固不乏人豈懷道抱德深藏不市尸而
祝之不可得耶二程子以道學繼孔孟不傳之緒生於
黃陂為漢陽鄰壤其門人游氏嘗守是邦程子稱其德

器睅然學問日進則取諸其鄰與嘗所遊宦者不可以
莫之舉也即師生以原學之所自傳則濂溪周先生實
倡其始又即周程之學以究其所以光明盛大則新安
朱先生實成其終此五先生之祠所以立而學之文物
始備矣夫道統之傳自堯舜禹湯文武周公躬是道以
化天下周之衰斯道不行孔子孟子及其門人相與推
明之秦漢以來且千有餘歲洙泗之遺緒已墜而復振
非五先生之力歟則五先生者自當與孔孟之徒通祀

於學校況又其遺跡之可考則合而祀之使此邦之士知道統之有傳聖賢之可慕顧不偉歟當斯文晦蝕遺編殘脫之餘天運有開名儒繼出以高明之資強毅之志剖析毫釐張皇幽眇著之圖書炳如日月後學者蓋不待窮探力索可以目擊而道存焉然士風之壞久矣遊於學校者非科目不習也此豈士之罪哉漢陽之士入其門升其堂孔孟之徒森乎其前五先生之祠列乎其後尊其人讀其書明其道心之所存身之所履必有

以超然自得者則夫有道有德下以教國之子弟上以
紹諸儒正統之傳豈其無人歟豈其無人歟遂為之記
以授其學者俾勒石於庭以俟明年正月元日謹記

鄂州州學四賢堂記

陰陽分而五行具人物生而萬事出太極之妙為之根
柢而周流其間充塞宇宙貫徹古今不可須臾離也形
交氣感而稟受不齊欲動情勝而好惡無節心以形役
志以氣移理以慾昏性以情鑿鄉之不可離者梧亡茅

塞莫之存矣圖書出而天文始兆聖賢生而人物始開
二儀肇分仁義著矣五氣順布五事備矣禮以天秩典
以天叙而教行焉因至顯之象驗至微之理即人事之
當然察天命之本然加之以操存持養則動容周旋無
適而不由於斯道之中矣聖賢之功與天無間凡有血
氣莫不尊親心之秉彝不容已也周德旣衰邪說並作
言道者祖虛無論治者尚功利談經者溺訓詁工文者
騁詞華千有餘年天理湮晦雖閎博俊偉之才未有能

窮其指歸者也聖宋龍興德配天地尊道以儒出治以仁經術文章一根於理鴻儒碩士彬彬輩出上儼三代下軼漢唐何其盛哉漸摩積累斯道之久蝕者復明焉濂溪周先生不由師傳洞見道體推無極太極以明陰陽五行之本人物化生萬事紛擾則定之以中正仁義而人極立焉蓋與河圖洛書相為表裏周子以授伊洛二程子程子所言道德性命皆自此出而微詞奧義學者未之達也新安朱先生稟資高明厲志剛毅深潛默

識篤信力行體用一源顯微無間之旨超然獨悟而又
條畫演譯以示後學周程之道至是而始著矣窮理盡
性以至命存心養性以事天非四先生孰發之道之不
明以學者無所見而異端禍之也四先生之道本諸人
心之所固有天理之不可易則邪說不得肆而昏趨於
至正之途止於至善之地矣天下學者尊信崇尚以為
孔孟之徒復生斯世祠之學宮以起學者敬慕之心是
則師儒之職會稽石君繼喻之意也石君為鄂州教授

而餘適分符於沔石君之先太常寺簿師朱先生為門人高弟以餘為同門後進也嘉定八年春二月四先生祠堂成遣其學正張頤孫來請記四先生之書家傳而人誦之矣述其關於道體之大要以見四先生之道光明盛大其本原固有自也夫以天命之在人甚明前賢之教人甚至聖朝之重道甚隆師儒之衛道甚切則遊於學校而拜於祠下者亦思所以自勉哉後學黃餘謹記

南康軍新修白鹿書院記

廬山之陽傑然而以峯名者五老五老之麓窈然而以洞名者白鹿唐太子賓客李公渤之所隱居而南唐廣之以為養士之地聖宋肇興文教敷暢開寶中有以高第知廬山學士而洞學始盛太平興國有賜書之寵大中祥符有加繕之命慶歷詔郡縣皆立學而舊有學者率仍其舊聖祖神宗所以崇儒風惠士子者至矣蕩為丘墟莽為荆榛者豈立學之後士趨簡便不復為林泉

之適耶淳熙八年詔以文公朱先生起家為郡始得遺址規復之歲適大祲役從其簡已而請額與書以重其事則其簡也固有待也繼為郡侯為博士者累累增治然量力之宜踵堂之舊未有能侈而大之者也嘉定十年先生之子在以大理正來踐世職思所以揚休命成先志鳩工度材缺者增之為前賢之祠寓賓之館閣東之齋趨洞之路狹者廣之為禮殿為直舍為門為墉已具而弊者新之雖庀漏之屬不苟也又以先生嘗著跪

坐之制聞於朝請釐正之其規模閎壯皆宅郡學所不
及於康廬絕特之觀甚稱於諸生講肄之所甚宜宣聖
朝崇尚之風成前人教育之美皆可無憾矣周衰道晦
且千餘載周程夫子始得孔孟不傳之緒未及百年大
義乖矣先生洞究其道而推其所未發其為郡也固嘗
與諸生熟講之規誨之語約而盡矣今侯亦招致嘗從
學先生而通其說者使長其事講授焉所望於諸生宜
淺哉苟徒資口腹媒利祿而治心修身漫不加意則既

失崇尚教育之旨覽觀山川之勝周旋堂宇之盛於心
安乎侯之為政得於過庭詩禮之餘戢姦扶弱革弊興
壞而尤以字民為先務南康地瘠民貧先生累乞蠲減
租稅與凡無藝之征侯亦捫滲漏節浮冗代民之輸而
蠲其負者至緡錢六萬餘尚能以其餘力屬意於儒官
者如此是固不可不書餘項從先生游及觀書院之始
後三十有八年復觀書院之成既悲往昔之不復見又
喜賢侯之善繼其志命之記不得辭也是為記嘉定十

年三月也

李德進毋自欺齋記

李君德進自太學歸蜀祭酒袁公喜其篤實而嗜學也
為書毋自欺以勉之李君將歸以名其齋踰江過瀟山
屬予為之記予聞學問之道知與行而已自昔聖人繼
天立極不曰知而曰精不曰行而曰一知不精行不一
猶不知不行也聖賢相傳啟悟後學言知必曰知至言
意必曰意誠至則事物之理無不通誠則念慮之發無

不實曰至與誠其精一之謂歟知與行者學之塗轍至
與誠者學之歸宿有志於道者可不孳孳求止於是歟
江出岷山東望滄海不知其幾千里也滔滔不息卒亦
至焉誠故也觀於此則毋自欺之意可見矣予方懷信
道不篤之懼而德進之請適有感於予遂不辭而述其
所聞以諗之且以自警云德進名輜之隆山人嘉定丁
丑五月丁酉長樂黃縣記

陳師復仰止堂記

仰止堂者丞相正獻陳公舊第之東偏晦菴文公朱先生嘗館焉文公樂其道而忘人之勢不遠千里而勤館人正獻公樂道而忘勢折節行館而與之友二公之在此堂道相與也堂之面其山曰壺公峻拔端重若正人端士翔拱而進也文公之館于此正獻公之子皆樞衣馬太府寺丞密長而益嗜學思文公而不得見登其堂望其山如見其人焉取高山仰止之義以名之既與朋友講習於其中而屬縣為之記聖賢之生斯世盛德至

善血氣之屬莫不尊親者宜自外至哉秉彝好德良心之不自已也學者之於聖賢思其居處而起敬焉豈特聞風而悅之哉尊德樂道志於學者之不能已也寺丞之名此堂可謂良心之發而能志於學者矣抑因是而有感焉道原於天聖賢體天立道而示諸人若喬嶽焉可望而登也人昏仰之然無目者不見資稟累之也遂獸者不見物欲昏之也指一草木而謂之山見之偏且小者也有見矣趨而下焉捨喬而入幽也既趨矣峻則

止焉半途而遂廢也此豈無人心而不知學哉心不充學不力也今之學者有不蹈此者乎吾懼斯道之日晦也誠能居敬以立其本窮理以致其知力行以踐其實體高山景行一仰一行相為先後之意循序而漸進自強而不息始見其彌高終見其卓爾羹牆與立無非道也則於斯堂之義庶乎無愧矣豈有他哉充其好德之心厲其好學之志也寺丞立朝臨政能任道者也故推其所感者以勉之且示同志使有警也長樂黃縣記

家本仲無欲齋記

家本仲訪予於干山之下相與讀周子程子以及先師
朱子之書探其端緒以求其本原至於周子無欲則靜
之旨本仲喟然嘆曰入德之要其在茲乎是可以名吾
齋矣盍為我言其義予嘉本仲擇之精信之篤幸吾黨
之有人斯文之未墜也為之言曰寂然不動心之體也
事物未接思慮未萌湛然純一如水之止如衡之平則
其本靜矣蔽交於前其中則遷而欲生焉欲熾而益蕩

感物而動者既失其節寂然不動者亦且紛紜膠擾而不能以頃刻寧動靜相因展轉迷亂天理日微人欲日肆矣故主靜者所以制乎動無欲者所以全乎靜此周子之意而亦有所自來也艮其背不獲其身行其庭不見其人主乎靜也旦晝之枯亡則夜氣不足以存無欲則靜也豈惟聖賢之教為然哉春夏陽之動也秋冬陰之靜也方其靜也一物不生萬籟不鳴木反於根水凝於淵不若是無以噓衆陽而生萬物及其動也物各付

物天何心哉天且無心欲何有焉不若是無以肅群陰而成歲功矣天且不違而況於人乎夫健順五常性也精氣百骸形也君臣父子夫婦兄弟朋友之交道也徇耳目口腹之欲以厭足其蕞爾之形靜以賊本然之心動以害當然之道上以逆天地之化下以違聖賢之教於禽獸奚擇焉誠能反而思之天之所以予我者如是其尊且貴也先立乎其大者則小者莫能奪焉視世之功名富貴人之所大欲眇然若浮埃之在太空而況車

馬衾裘飽食之間乎蓋將與造物者相從於冲漠之境
而非人世之所能羈繫也所謂襟懷灑落如光風霽月
者其所存可知矣周子推明無極動靜之義以繼孔孟
不傳之緒而斷之以無欲則靜之一言至其論聖學則
曰無欲則靜虛動直論養心則曰無欲則誠立明通然
則聖傳之樞要學者之塗轍果不出於斯言也哉本仲
名演眉山嘉定己卯正旦長樂黃縣記

李兵部祠堂記

兵部郎中知果州李君道傳字貫之既歿之二年有祠
之於南康軍廬山棲賢寺者貫之自蜀來仕東南以不
及執經晦菴朱先生之門為恨凡從先生游者皆誦首
願與之交凡先生之遺書與其師生問答皆手抄成誦
晝夜不倦其天資敏悟固已默而識之矣其有疑未釋
者必反復問辨以求其正由是通達該貫而篤信力行
見之行事者又皆卓然可敬東南之士歛衽推服使貫
之及登先生之門當不在諸子之下先生歿而私淑諸

人以有得者當以貫之為首與之處者久而益親及其
歿也思之而不能忘貫之去國而艤舟於山之北日與
朋友往來於巖壑泉石之間而於玉淵三峽之勝尤惓
惓不忍去與之游者亦不忍貫之之遂至此也至今思
貫之者猶是貫之之徜徉乎其間嗚呼此祠之所為立
也道之不明自古病之貫之未得為晦菴先生徒也而
其所自得孚於人者如是貫之未嘗有德於人而人親
慕之以道故也則道豈難知而人亦豈可不志於道哉

祠之立既足以見尊賢樂善之誠而過其下者亦豈無聞風而興起者哉予懼其所以立祠者無以自白於世故為之言而非立祠之本意者皆不著嘉定己卯人日友人黃縣記

袁州重建韓文公廟記

自堯舜至於孟子二千年間聖賢迭興以道相授其章章較著者前後相望也臯陶伊尹萊朱太公望散宜生之倫亦皆得以與知道者之列顏曾子思則不待言而

源流可考也自孟子蓋千年而後有韓公獨以斯道之傳為己任以古準今抑何盛衰顯晦之殊耶古者道德一風俗同歷世雖久所守者一說其見素明也周衰異端之禍起學者各以所見為守而道始晦故古之為道也易後之為道也難若韓公者尋墜緒於支離踏駁之餘而卓然有見焉則自比於聖賢以冀斯道之傳宜矣公固以道自任後之稱公者亦以道歸之約六經之旨以起八代之衰排二氏之非以濟天下之溺諫宮市貶

諫佛骨又貶流離困躓瀕死而不悔公如鎮州迂公者
皆甲人為公危之公以理開諭皆俛首聽命非有道能
若是乎然先儒頌公之言獨曰軻之死不得其傳非公
有所見則所傳者何事且公之所見者何也天之所命
之謂性公則曰所以為性者五曰仁義禮智信率性而
行之之謂道公則曰由仁義而之焉之謂道修道以導
民之謂教公則曰其法禮樂刑政其位君臣父子由是
而充之則日用常行莫非天理而私意人欲邪說詭論

無所容乎其間矣其詞確其旨明此宜臆度料想所能及哉體於身驗於心斷斷乎不可易也以公之所見觀之則聖賢所傳其不以是歟荀楊氏去孟氏未遠也醇疵之不同其見者異也公稱孟子醇而斥荀楊之疵則公之見蓋有得於孟氏而又以自況也公之書一則仁義二則仁義見之明也如此居仁由義聖賢事業不難進也而況言論氣節之一二乎故論公之迹不足以知公之深觀公之所見則公之以道自任者可知矣公嘗

為袁守袁故有公廟後遷焉尋復其舊歲久頽圯太守
著作郎中鄭侯自誠始新之宗正少卿滕侯強恕續成
之而屬縣記其事世之稱公者既不足以知公之深甚
者則指公為文人而又以文為道使聖賢之道不明而
公之旁搜遠紹辛苦而僅有之者生不得究其施設無
以白於後非先儒發其蘊公之志何自而伸耶推先儒
之言以明公之蘊其敢以陋為辭縣不敢以文尊公則
公亦必不鄙其文之陋也廟之役始於嘉定戊寅十月

其成以己卯三月董其役者司戶高炎後三月望日長樂黃幹記

曾氏樂斯菴記

建陽縣之東北有山曰竹原草堂劉先生之隱居晦菴朱先生執經問道之所也章貢曾君堅伯愛其溪山之勝慨慕先賢之陳迹築菴於其旁曰樂哉斯丘也生以佚吾老歿以藏吾骨也予嘗與堅伯遊而深知其為人侗儻負奇氣不為齷齪軟美計顧毫末以自同於流俗

其居官以才廉稱其於勢利泊如也考其源流則又文清公之從孫習聞其家法而恪守之故其敬賢樂善雖老不忘而於死生之變浩乎不以動其中也死生旦晝之常也古之人歿壽不貳而修身以俟之耳曷嘗置喜戚於其間哉鄙夫庸人生既無益於世而徘徊顧戀猶冀其久存於世蓋其識見既陋而貪鄙之習沈痼而不能以自脫也觀於此則堅伯之名其菴而自以為樂是不謂之賢乎堅伯名松氣貌甚偉精力倍人猶可仕也

自以朝請郎江西安撫司參議官請於朝致其事云嘉定辛巳二月朔長樂黃縣記

台州州學四先生祠堂記

代劉晦伯作

嘉定五年春正月天台郡學始建四先生祠堂郡侯豫章黃檜以其事來言曰故侍講文公朱先生聞道里閭為世師表台之士受業於其門者衆淳熙間浙東大飢詔起先生為常平使者部內賴以生活台之民蒙其德尤厚先生之學實得濂溪周先生伊洛二程先生之正

傳故併祠之庶幾邦人有所嚮慕興起而斯道之不亡
四先生力也願有記某竊惟黃侯因邦人感先生之賜
而推原其學之所自出以風厲之其於化民成俗之意
篤矣然四先生之學則某雖不敏嘗竊聞之惟皇上帝
降衷於民本然之性純粹至善窮理以致其知反躬以
踐其實則齊家治國平天下亦舉而措之耳三代而上
立學教人孔孟迭興立言垂世非有他道也四先生之
學亦起於千載之後繼孔孟不傳之統而已顧其去古

既遠淺陋之習陷溺乎人心一聞正大之論則羣起而非之下之既自賊其本然之善為政者又舉其善俗之道而棄之儒風治效浸不如古非此之故歟今黃侯之建是祠也既有以尊顯其人又刊其所著之書日與學者講習之推明其道台之人將日捨其淺陋之習而趨於正大之見矣使凡為政者皆如黃侯之化其民而其民亦皆如台之人從黃侯之化則真儒輩出善治日興黃侯之惠豈特一郡而已哉某也官長成均適當聖化

更新崇儒重道之日方將叙正祀典剡聞天朝以表示
當世嘉黃侯之能開其端也遂為之記俾勒石於庭以
俟

勉齋集卷二十

欽定四庫全書

勉齋集卷二十一

宋 黃榦 撰

序

送陳元平宰邵武序

陳君以英豪邁往之氣少以功名自許熟於民情軍政之利病與之語疊疊不倦老吏宿將歛衽畏服而獨喜與世之守章句語道理繩趨而尺步者遊苟誠其人不問爵齒必誦首下問此豈非其本心也哉世率以果敢

捷給病陳君而戒以靜重詳審予以為人患無志耳士
固有志於聖賢之學而為氣所勝未能遽易其習尚之
偏者然志氣之帥苟有其志氣亦安能卒勝之耶人之
氣稟固有剛柔之異然剛者易折而柔者難扶安知前
日為吾病者不反以贊吾今日自治之決耶陳君於吾
道汲汲向慕而才豪氣剛尚有持尺箠取中原之意抑
豈不能自治其氣稟之偏耶靜重詳審之言予將有考
矣陳君今為邵武令一日過門而別曰我行矣子亦有

以語我乎予於陳君為後輩且駕劣不足與語而猶若
是則其志可知矣予嘗聞邵武有故尚書黃公終日正
容危坐視其貌若無以異於常人聽其言呐然如不能
出諸其口一旦立便殿上與天子相與可否凜凜然不
可犯君今訪諸鄉人而式於其間其亦有所感也夫春
水渺瀰兩溪之間不辨牛馬而霜降水涸蛟龍諸藏者
乃天地之全功也陳君具尚勉之哉紹熙辛亥暮春既
望北山黃縣序

輔仁錄序

韓嘗誦谷風之詩而為之掩卷太息曰嗟乎人之大倫
五朋友居一焉豈不重哉自天地陰陽升降上下而君
臣之義父子之恩夫婦之別長幼之序著矣朋友者果
何自而然耶方以類聚物以羣分天之道也人之與人
類也朋友者人類之中志同而道合者也故曰天叙有
典豈人力也哉君臣父子夫婦長幼一失其序則天典
不立而人道化為物類矣朋友道絕則此四者雖欲各

居其分不可得也善而莫予告也過而莫予規也觀感
廢而怠心生講習疎而實理晦則五常百行顛倒錯謬
而不可勝揀矣然則朋友者列於人倫而又所以紀綱
人倫者也所可重者若此而世莫之重焉可不為之屢
嘆也耶世教不明人心益薄生而知愛長而知敬者往
往奪於利慾而不能以相保況其倏然集忽然散如太
虛浮雲之無所倚薄者乎宜其苟合輕棄而不以動其
心也雖然抑有由矣相習也以利相許也以氣相附也

以勢平居講切無補於人心天理之毫髮甚者又從而
斷喪之有之既不足以為益則棄之亦不足以為憾矣
誠能思夫天典之所固有人倫之所賴以立雖欲勿重
其可得哉吾友黃君公泰謁縣而言曰學者之所志人
道之當然耳久要之不忘獨非人道之當然乎朝於斯
夕於斯一旦離索焉而姓名邑里之不紀其何以慰吾
拳拳之念耶遂出錄屬縣名之而俾序其意縣謂此道
不明久矣公泰知其有所輔於已也願以輔仁名之可

乎抑嘗聞之朋友所以輔吾仁而非志於仁則亦無以盡朋友之道人之生同稟此氣同具此理大吾心而達觀之不見其為異也朋友之交亦去其物我之私而已有善焉公為之有過焉公改之資人以成己推其所以望於己者而勉人也盡其心平其氣毋匿毋拒毋徇毋惡則故舊之情將銘諸心而不能忘也況是錄之可攷乎不然則屢書之矣益同志其勉之歟方有賴焉爾紹熙辛亥六月九日北山黃榦謹序

送徐居父歸永嘉序

韓嘗讀詹事王公之文觀其序篇致意於君子小人之際而得公之用心明白若日月浩汗若河漢未嘗不廢卷而嘆也曰世豈復有斯人也耶高明廣大者天理之公也詰曲偏暗者人欲之私也天理不明人欲日肆世豈復有斯人也耶及考其世系則公永嘉人也嘗欲遊於其鄉以覽觀山川之勝訪於其鄉之士豈無聞公之風而興起者乎淳熙甲辰始識包君定於武夷之下越

八年復識徐君居父於清潭之濱旣又因居父識其兄
仁父其外弟葉君味道與凡遊且官於是邦者則疇昔
之嚮慕固不待跋履之艱訪問之勤得以與之周旋矣
至於人聞其名家藏其書號為一世能言之士而射策
決科者皆宗之則猶以未得竊伏下風為恨也嗚呼公
不復作矣公之用心余殆將有所考焉而世之說者乃
曰皓皓者易污不若循循而俯者之可以集事也則公
之用心是耶非歟居父之歸也弔望於王公之墓而過

諸其友其為予問之紹熙辛亥九月六日北山黃榦序

代仲兄會表兄弟序

北山黃東招其內弟鄭肅子恭而告之曰吾從母昆弟
昏葉出也葉氏昆弟猶吾從母之昆弟也凡三姓四家
雖所系不同自吾外祖父母以來一本而已先王制禮
列之五服之次以為總麻之戚焉古之總麻非今之所
謂總麻者也其歲月必相往來吉凶必相慶弔出入必
相餞勞禍患必相賙卹亦其理宜也世降俗末利害交

攻一室之內同姓之中尚有爭毫末相關閱者況於異
居別族之親乎吾故昆弟散而居於城之東西南者有
累十數年而不相見者焉邂逅相遇問起居外僅能貌
相勞苦而已漠然無情矣至於諸姒諸子則有終其身
而不識面者焉吉凶禍患之來而能為之同其苦樂者
亦罕矣嗚呼此豈人道之所可安也哉吾嘗記為童子
日外祖父母皆亡恙歲冬之朝兄弟畢集相與握手終
日談諧笑語市棗栗相啖迨其去則留連不忍捨旦暮

又思之而幸其復來也豈非秉彝良心有不能已者及其長也而後休於習俗迫於利害而不能以相保與此有識者之所當慨念也今吾欲與兄弟約以歲正月之十日六月之二十日會於天寧之浮屠天寧居城南十里於吾三姓兄弟之往來道理適均人具有一椀酒一壺飯一器春蟪夏荔不拘其數合而飲食之古人騷賦詩詠與夫投壺弓矢之具有則攜之以供娛樂相告語以孝悌忠信相問勞以老少安否家計有無至於農圃

桑麻之業皆可抵掌而劇談也世俗俚下之詞閨閨米
鹽之賤則謹勿出諸其口晨而往戴星而歸於是重親
族厚風教不其善歟子恭曰善哉盍為之期日而告之
乎余曰吾二十年前表兄弟之存者二十有一人今其
亡者六人矣亡者不可復作其僅存而長者不下四五
人少者亦既娶婦抱子矣使此十有五人者皆康寧皆
壽考皆歲無他適而能相樂其為斯會也亦不過七八
十日而無此身矣人生百年之間兄弟十有五人而無

七八十日之相樂其與路人奚擇焉則是會也誠有不
可緩者吾欲始以壬子之春何如子恭曰善哉敬受教
遂述其言如此遍以告諸兄弟俾書其姓名於左曰如
約東長也謹書曰黃東如約

林仲則二子名字序

慶元戊午予屏居箕山林仲則之二子曰庚曰武者自
栗山來從予遊明年予將為武夷之行而二子者亦且
將冠仲則以書來曰吾將易其童穉所命之名而因以

字之願以屬子可乎予與仲則兄弟交最久而二子者
復從學於予其何說之辭予觀庚也慤而武也敏慤者
恐其不志於學而敏者恐其不力於行故名庚以學之
名武以行之學之則聞見博而雖愚必明矣行之則德
日起而雖柔必強矣故字學之曰伯明父字行之曰仲
強父二子其勉之栗山之俗率以長子主家於內次子
讀書於外使主家者知學則公平友愛之義篤而家之
道益和以昌讀書者能行則孝悌恭順之道隆而所以

讀書者不但口耳之末而已不然吾恐內焉妻孥之慮
重外焉子弟之軼廢乖爭陵犯之風將由是起矣故予
之所以名而字之者不惟就二子之質而亦以因其俗
不惟二子可勉而凡栗山之從吾遊者蓋皆有以思吾
言矣冬至後二日北山黃蘗序

久要錄序

非天屬之親非名位之臨倏然相聚於千百里之外一
朝去之姓名爵里有不及記者此久要錄之所不可無

也然非天屬而愛生焉非名位而敬生焉姓名爵里不相與而不可不錄焉者道義切磨之功人道之至重天理之不能忘也異日離群索居取是錄而觀之某賢與某始善而中變與某日進而不已與皆可以致吾忻慕慨嘆之意而亦以為進德之助者是錄之作豈小補哉書之編首以諗同志云長樂黃榦序

送許太博入宇文宣撫幕府序

天地之間一陰一陽兩儀立焉陰陽有老少四象生焉

形而上謂之道形而下謂之器語大天下莫能載語小天下莫能破皆不出是四者而已人之一身仁禮為陽義智為陰兩儀也仁為木禮為火義為金智為水四象也形而上者也肝心為陽腎肺為陰兩儀也肝為木心為火肺為金腎為水四象也形而下者也耳目鼻口之分少長老死之變喜怒哀樂之感惻隱羞惡辭讓是非之情與夫五常百行未有出四者之外者也語大則天地日月鬼神四時不能遠也語小則一草一木無不具

也四者之妙其淵深廣大如此人之所以與天地並立而無間者於此器之中具此道也所以為聖為賢而超乎人物者於此器之中由此道也格物致知窮此道也存誠居敬守此道也無以窮之則固然無所見無以守之則茫然無所得雖具人之形其與禽獸不遠矣世教不明學者知之而未必求求之而未必熟不至乎熟猶無見無得也至乎熟則動容周旋無適而非四者之用也古之君子所以自強不息者亦將有以熟之也閑禧

丁卯尚書宇文公出帥江陵宣威荆襄辟許君為屬而
列予於下陳雖以病辭不果行而因以得交於許君一
日相與語康節先生之學有感於數之起於四者予因
極言之以諗許君且以自警云長樂黃縣序

葉雲叟子名序

葉雲叟以嘉定丙子後七月生男越三日來請名予與
雲叟舊且好也不容辭諗之曰正得秋而萬物成天道
也閏以積分而成月乃定時而成歲雲叟奉母自括蒼

來居於此種學甚力持身甚謹此鄉之人皆敬愛之今
遂娶婦生子矣其亦至此而有成乎天啟之矣請以成
子名之歲適大比雲叟行將衰然為舉首此其成之兆
乎若夫學者所以成德也知類通達強立而不反謂之
大成予於雲叟父子有望焉冲佑逸吏黃榦序

趙季仁二子字序

吾友趙君季仁之二子長曰希諱次曰希謐將為之加
冠而重成人也求字於其友黃榦按釋文諱謂告曉之

熟也諳謂中也此因言而訓也即言以求其心則言之
熟者致敬而不敢忽也言之中者度義而不敢苟也夫
學豈徒言而已哉故字諱以伯敬甫字諱以仲義甫易
曰君子敬以直內義以方外程子曰敬立而內直義形
而外方直而方則大矣有志於學捨敬與義將安適乎
季仁好學者也二子必能世其業故為之字而序其意
以勉之嘉定丁丑長至冲佑散吏黃幹序

黃西坡文集序

善學者先立其本文詞之末達而已矣然本深者未必
茂不務其本而末焉是先未見其能工也予始識西坡
黃君見其神清氣勇襟懷卓犖而知其資稟之異見其
從師問學而恐不及而知其趨向之正見其臨民多惠
政立朝多壯節而知其事業之偉歲適大祲人相食官
吏畏首畏尾束手坐視君發廩蠲租不待報竟以得罪
偽禁方嚴學者更名他師至有師歿不弔者君謫居不
遠千里哭泣犇赴投閒十年人不能堪君泊如也有本

者如是文詞特餘事耳慶元初天子方慨然建立治功
收召四方知名之士君亦駸駸嚮用矣使得究其蘊豈
但文詞之足稱哉君為南昌郡博士予始識君於康廬
今四十年矣哲人其萎而從遊諸老皆無在者過君家
訪其子如見其人焉其子池州法曹杭出君文一編示
予俾序之予懼讀君之文者愛其詞不求其本故為之
言某年某月某日長樂黃縣序

林子至子字序

貢者下獻上之稱也球琳琅玕與夫橘柚之屬皆可以
供朝廷宗廟賓客禮樂之用而後貢故夏書九州之貢
以物名周禮邦國之貢以用名下之獻其上非有用不
貢也朝廷資人才以共治諸侯擇其賢且能者以獻於
上亦曰貢得其人則足以建功立業否則蠹國害民尤
不可以無用者貢也二者皆以有用貢而人才之用為
尤大然致其用者在人養其用者在己古者禮義之教
素明士之所自養者莫非有用之實後世以文詞取士

則皆空言而無實用矣是以君子少而小人多治日少而亂日多職此之由也然則為士而將貢於上其可不以有用者自養乎栗山林子至名其子以貢而問字於予為之字曰用之勉乎哉行將見子干霄凌雲而為棟梁之用根闢柢楔非所望於吾子也嘉定己卯夏至冲佑散吏黃榦序

送方明父歸岳陽序

晦菴先生以道德為學者師榦少不自量得與弟子列

竊窺其容貌端莊儼然終日未嘗懈玩索理義片詞隻
字未嘗忽厲志聖賢以身任道未嘗忘誘掖後進寸長
片善未嘗棄端居一室世之玩好無所嗜安貧自樂世
之富貴無所慕篤信善道世之毀譽無所恤臨事度義
世之利害無所擇其精微高遠者非末學所可知其可
知者亦人之所共知也四方學者從遊者數百人今其
存蓋無幾先生之書則家藏而人誦之讀其言者未必
通其義通其義者未必明諸心凜凜乎微言之絕大義

之乖也先生歿十有餘年蜀有李君道傳貫之者乃獨求之文字朋友之間篤學力行卓乎有不可及顧其不幸不見先生而親炙之又不幸蚤世以歿不及究其學充其志也嘗深痛之以為今之世不復有斯人矣又五六年有家演本仲者其志學操行視貫之伯仲也豈蜀之人物獨盛於東南耶今又得吾明父焉於理義之大端講之熟矣尤深病夫世之學者言行之背馳義利之交戰也而深懲焉觀其志之所趨蓋未可量也明父復

為予言番陽饒曾師魯之為人自以為莫及也以是觀
之天壤之間英靈之氣鍾為人物者何代無之洙泗濂
洛之學深微隱奧者至先生而昭昭然若大明之中天
也尚何微言絕大義乖之足憂乎此予之所以釋然以
喜也抑嘗有聞焉夫子之道惟曾子孟子得其傳曾子
曰士不可以不弘毅孟子曰其為氣也至大至剛子思
之中庸受之曾子而傳之孟子一篇之中無非弘毅剛
大之意惟明父勉之先生之學庶乎有望焉於其行也

書以為贈嘉定庚辰正月二十有七日長樂黃榦序

趙季仁習鄉飲酒儀序

請賓介陳器饌獻賓介獻饌旅酬燕六者禮之大節也
登降辭受禮之文也鼎俎簋豆禮之器也脯醢膾炙禮
之用也此觀禮者所共知也其數易知其義難知也鄉
教親睦也鄉間親睦陵犯爭訟之風息矣夫禮主於敬
敬勝則乖乖則離聖人制禮必濟之以和和勝則瀆瀆
則慢聖人制禮必濟之以敬始之以禮教敬也終之以

樂教和也拜至拜洗拜送拜既敬之至也請安請坐爵
樂如奠和之至也敬而和禮之大義也此所以親睦鄉
閭而息陵犯爭訟之風也降洗降盥潔也辭盥辭洗遜
也父坐子立孝也老者坐於上少者立於下弟也飲食
必祭不忘本也酬爵不舉不盡人之忠也序賓以賢貴
德也序坐以齒貴長也序饌以爵貴貴也工歌必獻不
忘功也燕及沃洗不忘賤也歌闕睢葛覃卷耳齊家之
義著矣一飲一食一拜一坐一揖一降無非教也通於

義者又非但可以親睦鄉閭而已也天理得人心正無所施而不可也聖人著為禮以教人凡為鄉人者皆知此義焉此成周之世所以人人皆有士君子之行也禮廢樂墜鄉人之羣飲者未嘗廢豐飲食侈供帳悅聲妓恣驩噉教侈也誨淫也恣欲也無非所以敗人心者也此後世之士大夫曾古之服勤於猷畝者之不若也然則是禮也雖不行於今之世學士大夫之有志於古者其可不思所以講明而肄習之歟吾友趙君師恕宦不

達而忘其貧今不合而志於古其為邑餘杭嘗行鄉飲
酒之禮矣今復舉是禮與鄉之有志之士講肄焉禮成
予猶恐觀禮者習其數而不明其義也故紀其大畧使
刻之篇首嘉定庚辰六月朔旦長樂黃籛序

林良夫三子字序

傅佑仔皆所以佐助夫人者也吾友栗山林良夫以是
名其三子而求字於予名以望之父之志也字以補其
所不及朋友之教也良夫之名其子也蓋望其出為世

用以承弼厥辟左右有民也其志大矣韓之字之也先乎已而後能及乎人不先乎已為人之學也又安能及人也哉傳者所以輔夫人也必先自輔以成其德而後可以輔人故字之曰自輔佑者啓佑之以正也必先自正而後能正人故字之曰自正仔者任人之事者也必先能自任其事而後能任人之事故字之曰自任三子者之呼其名則當慨然曰此父之志也吾當志伊尹之所志人之呼三子以字也則當惕然曰此朋友之教也

吾當學顏子之所學能若是其於名若字也庶無愧乎
嘉定辛巳二月望日明道散吏黃榦序

與郭德元序


火陽剛故趨上然人憚而避之水陰柔故就下然人狎
而玩之人性亦然將趨上乎抑就下乎將為人所憚乎
抑為人所狎乎將趨上則不必求人之狎至於為人所
狎則不可不思吾之所處也然則趨上者當自安就下
者當自省也嘉定五年暮春旣望勉齋黃榦書寄郭兄

德元

李維志字序

志者心之有所之也心者天地之蘊化育之機人之所
以得以生者人有是心極其所之則人道可立雖參天
地贊化育亦豈有所假於外哉甚矣人之輕視其心也
之於名之於利何其卑且陋耶之於道者善矣用之不
專進之不力持之不堅猶無所之也如適千里之塗紛
然而多歧忽焉如中止安能有志乎吾友李維石名士

興病其字之不類也以維志易之其義以為學而有所
興起非志不能也復求其說於余維志嘗聞武夷夫子
之道而說之者其志已不為世俗之卑且陋矣故特以
人心本然之大與夫志之所以為志者論之詩云高山
仰止景行行止君子曰詩之好仁如此維志勉乎哉予
於子有所警矣紹熙甲寅八月既望北山黃榦謹序



勉齋集卷二十一

欽定四庫全書

集部

勉齋集卷二十三

詳校官庶吉士_臣吳烜

主事_臣呂雲標覆勘

總校官庶吉士_臣倉聖脉

校對官中書臣王家賓

謄錄監生_臣姚元開

欽定四庫全書

勉齋集卷二十三

宋 黃榦 撰

題跋

書蔡西山家書

榦始受學於晦菴先生首識西山蔡公先生之門從遊者多矣公之來先生必留數日往往通夕對牀不暇寢從先生遊者歸必過公之家聽其言論不忍去去皆充然有所得也蓋公負英邁之氣蘊該洽之學智極乎道

德性命之原行謹乎家庭唯諾之際於先生之門可謂
傑然者矣榦之識公為最久而荷公之教為最深其卜
居乎此也固惟先生是依亦庶幾資公之教以自老公
既不容於世以死而先生亦相繼而歿榦又將疇依耶
嗚呼吾先生者固累千百年不可復見若公者亦豈世
之所常有耶今年春先生以書一通授榦咨嗟太息者
久之曰此季通與其子書也子為我掇其要語繕寫以
來未及反命而先生歿因書其左方歸公之子使藏之

以致其悲慕之意云

代書晦菴先生四齋箴

晦菴先生以紹興癸酉主簿茲邑時年二十有二也其拳拳於學校之教悉矣而又為此銘而以誨學者欲其目之所睹耳之所聞無適而非義理之歸今師恕趙君鋟板縣庠且慮傳本之多無以取信後來因屬幹記之嗚呼先生不復見矣所恃以明善誠身者不過文字之間是豈可以不謹其所傳哉遂敬為之揮涕書此嘉定

辛酉十有一日朔旦門人長樂黃翰敬書

跋三衢毛氏增韻

書六藝之一諧聲六書之一也字書音韻之學其來尚矣古者教人八歲入小學教之以六藝十有五歲而後大學之教行焉夫必先之以小學而習之以七年者蓋其切於日用之實不若是無以博其識養其心而為進德之基其驚高者既忽之而不習徇卑者又與大學而併廢之不惟不習而反笑人之習則其不如古也宜哉

覽毛公之所述為之三太息云開禧乙丑二月五日長樂黃榦書於石門酒庫

跋方耕道書

余嘗聞方耕道為南軒先生之客有遺憾焉及聞李君子謂之語具道一時相與之意然後知傳者之妄也子謂出示耕道手書敬服其論議攻非之益耕道以直道事南軒而南軒能容之子謂又以是友耕道而耕道敬之又如此賓主規諫之難久矣豈其遇合自有時耶余

金匱要略卷之二十一
為之三復而三太息云開禧丁卯春社長樂黃榦書

書晦菴先生所書損益大象

損益之義大矣聖人獨有取於懲忿窒欲遷善改過何哉正心修身者學問之大端而齊家治國平天下之本也古之學者無一念不在身心之中後之學者無一念不在身心之外此賢愚所由分而聖人之所為深戒也晦菴先生二象以授學徒江君孚先所警於後學者至矣孚先以示其同學黃榦三復敬玩刻之臨川縣學以

勉同志庶亦知所以自警哉嘉定己巳莫春墾日敬書

跋樂安曾一菴歲月記

觀一菴曾君自處於生死之際亦可謂達矣哉一菴家貲累千金子四人好學守家法無所累於中而然也世之貴富安逸過一菴者何限至老愈饕死且不瞑者皆是一菴非達耶一菴能超然於生死至語諸子猶以不能光大門戶為恨抑豈未能忘情於窮達耶其曰醇謹勤儉讀書則是求諸己而已曷嘗以搖尾乞憐如墻間

之徒為能光且大哉一菴達者也余年六十有一一區之宅一囊之粟以自給尚趑趄俛首入銓曹讀曾君之記誠有愧矣因書其後以諭其子使毋忘乃翁之訓而亦以自厲云嘉定壬申二月既望勉齋黃榦書於武林旅舍

跋西山徐介甫手澤

此西山徐君子手澤也余不及識君而識君之壻胡伯量與其子烜觀君之擇壻與其教子則其人之賢猶可

想而知也曾子所謂其言也善者其此之謂與嘉定壬申長至長樂黃榦書於新淦縣無訟堂

書襲夢錫所編晦菴先生語錄

襲兄夢錫所編朱先生語錄字字皆格言也學者所當留意焉雖然言之於口不若會之於心者其旨深玩之於書不若體之於身者其理實熟味衣錦尚絅之章與夫默而識之之語則於是書也庶乎其有得矣嘉定癸酉七月望日門人黃榦敬書於臨川寓舍

跋南康胡氏鄉約

南康胡伯量以鄉約示其友黃榦讀已而嘆曰此鄉飲酒遺意也古之人於其鄉黨平居則相友相助有急則相救相賙其情誼之厚如此故其暇日相與為飲酒之禮以致其繾綣之情而因以寓其尊長卑幼之序如是風俗安得而不厚哉後世禮教不明人欲滋熾利害相攻情偽相勝一室之內父子兄弟乖爭陵犯者多矣而況於鄉鄰乎風俗之不如古亦宜矣哉伯量兄弟孝友

同居爨人無間言又能推其施之家者而達之鄉其有補於風教大矣故書其後以諭其鄉人使知其合於古誼相與守之而勿替云嘉定乙亥四月晦日書於鳳山書院

書晦菴先生語錄

晦菴朱先生所與門人問荅門人退而私竊記之先生歿其書始出記錄之語未必盡得其本旨而更相傳寫又多失其本真甚或輒自刪改雜亂訛舛幾不可讀李

君道傳貫之自蜀來仕於朝博求先生之遺書與之遊者亦樂為之搜訪多得記錄者之初本其後出守儀真持庾節於池陽又與葉賀孫潘時舉諸嘗從遊於先生之門者互相讐校重複者削之訛繆者正之有別錄者有不必錄者隨其所得為卷帙次第凡幾家總此有得者又將以附於後特以備散失廣其傳耳先生之著書多矣教人求道入德之方備矣師生函丈間往復詰難其辨愈詳其義愈精讀之竦然如侍燕間承謦欬也後

之學者誠能齋心而玩之歷千載而如會一堂合衆聞而悉歸一已是書之傳豈小補哉貫之既以鋟諸木以幹與聞次輯而俾述其意云嘉定乙亥十月朔旦門人黃榦謹書

書東萊呂先生寄李文簡手帖

侍郎李公以東萊先生手帖示榦既獲竊窺兩賢相與之意而所稱引莫非當世巨儒所講論莫非古先典訓何其盛哉今其人既不復見而其言亦不復聞豈亦氣

數消長驟盛者固忽衰與吾輩盍思所以自勉哉為之
三復太息云嘉定乙亥長至後一日後學黃榦敬書於
鳳山書院

書晦菴先生家禮

昔者聞諸先師曰禮者天理之節文人事之儀則也蓋
自天高而地下萬物散殊禮之制已存乎其中矣於五
行則為火於四序則為夏於四德則為亨莫非天理之
自然而不可易人稟五常之性以生則禮之體始具於

有生之初形而為恭敬辭遜著而為威儀度數則又皆
人事之當然而不容已也聖人因人情而制禮既本於
天理之正隆古之世習俗醇厚亦安行於是理之中世
降俗末人心邪僻天理堙晦於是始以禮為強世之具
矣先儒取其施於家者著為一家之書為斯世慮至切
也晦菴朱先生以其本末詳略猶有可疑斟酌損益更
為家禮務從本實以惠後學蓋以天理不可一日而不
存則是禮亦不可一日而或缺也先生教人自格物致

知誠意正心以修其身皆所以正人心復天理也則禮其可緩與迨其晚年討論家鄉侯國王朝之禮以復三代之隆典未及脫藁而先生歿矣此百世之遺恨也則是書已就而切於人倫日用之常學者其可不盡心與趙君師恕之宰餘杭也廼取是書鋟諸木以廣傳蓋有意乎武城弦歌之遺事學者得是書而習之又於先生所以教人者深致意焉然後知是書之作無非天理之自然人事之當然而不可一日缺也見之明信之篤守

之固禮教之行庶乎有望矣嘉定丙子夏至門人黃榦
敬書

跋陳履道先墳庵額大字

榦嘗受學於晦菴先生其所教人以孝弟為人道之大
端已而辱在子壻行家庭享祀丘墓展省皆得與執事
之列齋戒陳設滌濯烹飪皆曲盡其誠敬奉觴薦俎追
慕感慨泣涕如雨三十年間如一日焉凱風寒泉之思
蓋天資之美學力之到有以充其良知良能以至此也

孝於親而望於人陳公菴額之所為書也履道既能成其先大夫之志復以墨本為軸朝夕展玩如適丘壑而撫松楸悽愴之情自有不能已者故述余之所見以明先生之為此書履道之寶此書不但字畫之工而已嘉定丙子六月既望長樂黃榦敬書於竹林精舍

跋陳履道辯誣卷

大書以揚其親之美力辨以不忍其親之見誣皆子孫愛親之美也然貴顯而賙其族亦人道之當然徽猷公

既貴矣斥其母子宿昔無聊之狀亦非書法之所宜使其概嘗有聞焉書其事而諱其名斯可也然徽猷公之所成就自其器識之過人假使真如所言其志氣亦豈少衰哉賙不賙正不足為公之輕重則不必辨焉亦可也祖考之望其子孫子孫之孝其祖考固有在矣諸陳為建陽大族皆好學守家法則所以顯其親者豈在於大書而力辯耶辨謗之作所謂家事非外人所宜與然餘以寓居介於諸陳之間則亦里人也為里人而平其

爭誼也故為之書嘉定丙子六月既望里人黃翰書於竹林精舍

跋陳履道烝嘗田約

嘉定丙子六月既望陳履道訪余於竹林精舍出示其先墳庵額墓誌辯証烝嘗田約三卷無非孝愛其親之意而田約深遠矣可謂篤於人道之大端者也獺祭魚豺祭獸豺獺之祭非有所戒約而預為之備也禽獸微物而知奉其先况於人乎為物之靈而忘其追遠之念

曾禽獸之不若也況於為人戒備者如此而忍忘之乎
風俗之薄甚矣不但評語德色之可畏也視其親如仇
譬如路人者有之孩提之童不學而能者安在哉顧我
復我出入腹我而且若此況敢望其追念數十世之丘
墓乎此履道之所為諄諄也讀其約為之三太息而書
之以為世戒長樂黃榦書

書龜山楊先生家書

龜山先生晚年家書也其精明詳審如此非道學之力

歎翰蚤從晦菴先生遊因得講聞先生之道中年遊宦
學業遂廢歲月蹉跎老及之矣引疾來歸願畢此志師
亡友散獨抱遺編先生之孫浚攜書來訪三復起敬竊
書其後以致慨慕之意云嘉定丙子九月五日後學黃
翰敬書

書新淦郭氏叙譜堂記

人稟天地生物之心以為心凡在覆載之內者皆所當
愛也况族系之所自出雖枝分派別推而上之皆吾祖

宗之一氣耳可不知所愛乎不知所愛則上負於天地
下愧於祖宗矣新淦郭氏之於族人也既買田以給之
又為堂以聚之蓋知此義矣即此義而充之知此心之
無不徧知此理之無不同則將合覆載而為一堂也豈
不大哉予嘗為邑於新淦而聖與嘗問學於予聞其事
而嘉其志為是說以廣之嘉定丁丑長至定菴黃幹書

書陳宓學守城錄

宓學陳公之守城殆天下才非可學而能也然得其書

熟玩焉觸類而通之亦豈不可學哉顧嘗以為守城者
郡守僚屬之責也今之仕者二三年輒一易偶當暇閒
於是書固不屑讀倉卒擾攘則亦不暇讀矣若使邦人
皆取是書而讀之父子兄弟庠序里閭平居暇日相與
講說則凡在城之內者無非可與守城之人也況又切
於其身之利害則考之必精思之必審其為郡守僚屬
之助多矣予既與同官寓公士友合謀併力以成安慶
版築之役因以是書屬郡文學金淵刊之學官寓公士

友凡邦人之欲得是書者悉以遺之合一郡之見守一
郡之城當有得陳公之意於是書之外者矣凡為郡而
欲得是書以遺其邦人者又將以廣其傳焉則凡有城
者皆可守尚何外侮之足患哉嘉定戊寅二月既望長
樂黃榦書

書龜山楊先生帖

此靖康元年書也公年七十有四矣敵退圍解痛哭流
涕以防後患諫大夫責也言不見聽則浩然以歸亦足

以明勢之誠可憂也上下偷安方以和為可恃獨何歟
為之三復太息云嘉定己卯七月二十三日黃榦謹書

書趙華文行狀

榦少從晦菴先生遊竊聞篤行公之名攬其遺事俯仰
敬嘆如對古人後十餘歲遂獲與仲兄偕受知於丞相
忠定公竊窺言論設施之大槩華文方以少年擢高科
館於劉忠肅公之家而受業於晦菴先生之門遂與為
友焉其後從宦江西累累相遇則華文涉歷愈深年愈

高而德愈劬也投老來歸聞華文之子總幹君宰崇安
有惠政人多稱之五十年間及見其一家四世之賢如
此雖其事業所至有不同而其人之賢則皆處心以忠
實持身以端謹居家以孝友施之政者真知體國愛民
者也何其盛哉丙寅丁卯間幹方以事走京師及見權
姦薰焰忠良被禍殆若天道冥漠不可曉者及今觀之
鄙夫憮人根株鋤戮聞其名者不啻若犬彘而篤行公
之後赫奕盛大至於如此所謂福善禍淫者豈不灼然

可監也哉讀李君敬子所述華文之行實而敬題其後
為善者當知所勸而不善者亦當知所戒矣嘉定庚辰
十二月二十五日長樂黃榦書

勉齋集卷二十二